

# Párnáá vuoigâdvuodah -kovekoortâi kevttimiävtuttâsah

## Muštospellâ

Ärbivuáváláš muštospellâ, mast kalga uuccâd jorgod peevdi oolâ jurgâlum koortâin olmâ kove- já tekstâkorttâpaarâ. Pargo puáhtá porgâd jo-uv smaavâ juávhust tâi puddâtoimân ohtuu.

## Toimâláš muštospellâ

Jyehi uáppest lii jieijâs korttâ, moos kalga uuccâd paarâ nube uáppee koortâst luokkaast jotemáin. Uáppee finnee jo-uv kovekoortâ tâi tekstâkoortâ.

- Älkkeb versio: Jieijâs kove uázžu čäittid skipárân.
- Vaigâdub versio: Jieijâs kove ij uážu čäittid skipárân, pic kalga muštâlid, mii jieijâs koortâst uáinoo.

## Čääci kammust -tijppäsâš artikla já kove ovtâstitem

Uáppeeh juáhhojeh kyevti juávkun, luokan já ton ulgguubel. Nubbe juávkku finnee juáhâš jieijâs kovekoortâ, nubbe juávkku jieijâs tekstâkoortâ. Uáppeeh puátiht ohtâ häävild luokan uuccâd jieijâs tekstâkoortân paarâ. Uáppee uázžu uuccâd jieijâs paarâ tuše ohtii jieškoduv vuáru ääigi. Ko sun lii kavnam paarâ, te sun páácá ton paaldân. Jis uáppee ij kaavnâ paarâs, te sun máccá ovdâmerkkân ovtâin juolgijn njuškon vázáttâhân / monni eres sajan. Pargo puáhtá mutted vaigâdubbon ovdâmerkkân nuuvt, et jieijâs koortâ siskâldâs ij uážu muštâlid njuolgist. Meid jotteemvuovijd já sierâ pirrâs puáhtá mutâččid juávhu miel.

## KIM-sierâ

Kovekoortah piäijojeh peevdi oolâ já ohtâ juávhust váldá oovtâ kovekoortâ meddâl. Taavlust uáinojeh artiklah já uáppeeh kalgeh mušted, et mii artiklaid lii valdum meddâl peevdi alne.

## Muštočäällim

Máttáatteijee čihá tekstâkoortâid vázáttâhân. Uáppee loptee olssis kovekoortâ, muštâ artikla já piäjä koortâ paakâ vyelemužžân. Uáppee oca jieijâs koortâ vázáttuvâst, lohâ teevstâ, kuadá koortâ sajasis já keččâl čäällid teevstâ viihkon / pááppár oolâ, mii lii jieijâs pulbet kulen. Ulmen lii luhostud čäällid teevstâ nuuvt tárkká ko máhduláš, já nuuvtpa uáppee sáttá karttâd elâččid jieijâs koortâ kulen mangii. Ko uáppee lii kiergâttâm oovtâ artikla čäällim, te sun loptee kovekottâpaakâst uddâ koortâ. Pargo juátkoo tánávt máttáatteijee miäruštállâm ääigi verd.

## Parâsánádem

Uáppee juáhhojeh paaráid. Nubbe uáppee lohâ parâsis jiänušan tekstâkoortâst leijee artikla, mon nubbe sánádem vuáduhd čáálá viihkon tâi pááppár oolâ. Oovtâ artikla maŋa uáppeeh molsov roolâid já luptiv máttáatteijee korttâpiinoost uddâ koortâ.

## Pantomim/still-kove

Smaavâjuávkku finnee olssis artikla, mast sij kalgeh ráhtid pantomimoovdânpyehtim tâi still-kove. Luokka keččâl ervidid, et mii artiklaid lii koččamušâst. Pargo puáhtá mutted älkkeebin tuosâmáin tekstâkoortâid uáinusân projektoráin. Juávhu miel pargo puáhtá mutted älkkeebin tâi vaigâdubbon.

- Älkkeb versio: Smaavâjuávkku finnee kovekoortâ.
- Vaigâdub versio: Smaavâjuávkku finnee tekstâkoortâ.

## Alias

Jo-uv smaavâjuávhuin tâi ubâ luoka ohtsâš toimân. Ohtâ uáppein loptee koortâ, mon keččâl sánálávt čielgid eres luokan/smaavâjuávkun. Olmânáál ervidâm uáppee uázžu čielgid čuávuváá koortâ. Uáppeid puáhtá jyehid jo-uv kove- tâi tekstâkoortâid tâi siävuttid puoh koortâid koskânis.

- Pargo puáhtá porgâd meid pantomim vievâst, já talle ij pyevti kevttid saaniid.
- Pargo puáhtá mutted älkkeebin tuosâmáin ovdâmerkkân tekstâkoortâid projektoráin taavlun uáinusân, jis párnáá vuoigâdvuodah iä lah vala pyereest muštoost.

## Sáárgu já ervid

Uáppee pargeh pargo jo-uv oovtâst tâi smaavâjuávhuin. Ohtâ uáppee loptee koortâ, mon keččâl sárgud taavlun / pááppár oolâ. Eres luoka tâi juávhu pargon lii ervidid, et mon artiklast lii koččamuš.

## Smaavâjuávkku draama

Máttáatteijee juáhâ uáppeid smaavâjuávhuid. Jyehi uáppejuávkku finnee oovtâ artikla kove- já tekstâkoortâ. Uáppeeh valmâsteh juávhuin uccâ draamaovdânpyehtim tast, et maggaar párnáá eellim ličij, jis párnáá vuoigâdvuodâi sopâmušâst ij ličcii tot cekki.